

Որքան ինձ ախորժեղի էր լսել Մարոյից նրա ուխտագնացութեան ուրախալի, միեւնոյն ժամանակ անկապ պատմութիւնը, այստամենայնիւ ես անհամբերութեամբ նրա խօսքը կտրեցի, հարցնելով, թէ ո՞ր գնացին տղերքը եւ ինչո՞ւ ինձ թողեցին:

Նա ասաց, թէ տղերքը տեսնելով, ես քնած եմ, թողեցին հանգստանալ, իրանք գնացին որսորդութեան. թէ նրանք պատոհիրեցին Մարոյին յայտնել ինձ՝ եթէ ես ցանկութիւն կունենայի մասնակցել որսորդութեանը, կարող էի գտնել նրանց Խանա-սորի ձորի մէջ:

– Կուզե՞ս ասեմ, որ Մըհէն քո ձին թամբէ, – հարցրեց Մարօն: – Դու մի քան չե՞ս ուտի, ճանապարհը հեռու է, մինչեւ Խանա-սորի ձորը, շատ հեռու է, կը քաղցես: Ես հիմա կաթը տաքացրի, սերը քեզ համար պահեցի: Կուտե՞ս բերեմ:

«Քեզ համար պահեցի»... – այս խօսքերը հնչեցին իմ ականջին, որպէս քրոջ խօսքեր իրանց բոլոր անուշահոտութեամբ: Նա դեռ մտերիմ էր ինձ հետ, որպէս առաջ, երբ դեռ երեխայ էր, երբ իրանց տանից կերակուր էր բերում մեզ, որը բարի որսորդը բաժանում է իր աղքատ դրացու հետ:

– Բե՛ր, կուտեմ, – պատասխանեցի ես: – Ինչո՞ւ հենց «ինձ համար» սերը, – հարցրի յետոյ:

– «Լաւ է նոր սատանան, քան հին քահանան», – ասաց նա ծիծաղելով: – Կարօն եւ Ասլանը էլ այնքան երեսի տեղ չունեն, Սագօն իսօ զահլայ է տանում. ես նրան համբերել չեմ կարող: Բայց մենք վաղուայ ընկերներ ենք, այդպէս չե՞, Ֆարհատ:

– Ես այդպէս չէի մտածում, ես մտածում էի, երբ Մարօն ինձ տեսնէ, կասէ, դու իմ ընկերը չես, դու ինձ ծեծում էիր, երբ երեխայ էի:

– Ի՞նչ անենք, ես էլ Մարիամին ծեծում էի, մի օր երեսը ճանկռտեցի, արիւն դուրս եկաւ. հիմա այնքա՛ն ուզում եմ, այնքան ուզում եմ, որ նրան տեսնեմ: Նա հիմա ինձ չի կանչի «բոշա». նա հիմա խելօքացել է, չե՞, Ֆարհատ:

– Աւելի, քան Մագթաղը: Բայց դու Մագթաղին շատ էիր սիրում:

– Մագթաղը խեղճ երեխայ էր, Մարիամը գազան էր. ա՛խ, աստուած, մէկ օր չէր անցնի, որ մենք մէկ մէկու պատահելիս՝ չկռռենք: Ինչքա՛ն յիմարներ էինք մենք...:

Վաղեմի յիշողութիւնները զարթնեցրին նրա մէջ տխուր զգացմունքներ, եւ ուրախ աղջկայ պայծառ երեսը մռայլուցաւ սեւ թախիծներով: